

Mutze-Bebbi Bärn



Fasnacht 2005

Hesch (w)au e CHIP?

Wenn d'Problem hesch mit me Hund
will dir ain in d'Gweery kunnt,
wenn di e Hund in d'Wade bysst
oder gar in Garte schysst.

Wenn aine jault im Liebesschmärz
ass aim vor Mitlaid fascht bricht s'Härz;
oder hesch per Zuefall ain ertappt,
dass är dir e Byffdegg schnappt:
Denn wurdisch gärn sym Maischter brichte
er sell so guet sy und s'ko richte.

Fyr sone Fall hänn gscheyti Lyt - die gueti Kund -
e wunzig glayne CHIP erfunde, fyr di Hund,
wo me aifach schlicht und guet
am Hund ins Fudi pflanze duet.
Druff kame lääse, s'isch kummöd,
was fir e Beschtie vor aim stoot.
Wie s'Hundeli haisst und wämm as gheert
obs physisch fit isch oder gschteert,
obs Lyys het oder sunscht ä Bräschte
obs Kneche voorzieht oder Räschte.
Das alles duet dä CHIP aim Kund
voruusgesetzt me griegt dä Hund!

Nit nur by Hind sinn CHIP vo nutze
me kennt si au by Lyt benutze
wie das näggschte Gschichtli guet
und brezyys erglääre duet:

Dr Haiggi hett am Samschtig z'Nacht
e tolli Ryygasswälle gmacht.
Aagfange hett er mit me halbe Wysse
denn Bier und eppis scharfs zum Byssse
druffabe isch är wyter gwandlet
und im Rotlechlilmieu glandet.
Sy letscht Gäld isch dert unde
mit em Portmonee verschwunde.
Dr Baizer het nit viil verzellt
und ne am Graage uuse gschteilt.
Derte fallt är aifach um
und taucht ins Delirium.
Zwai Schugger sinn denn schliessligg koo
hännen zämmeglääse, uff e Poschte gnoo.
Si froogne us doch git är kei Antwort in sym Suff
gly entdegge si, är hett ä CHIP do stooht alls druff.

Haise dät är Haiggi Stoffel
läbt dihim unterem Pantoffel
wohnt am Syrpfliwäg z'Allschwil
Bluetgrubbe: dreyehalb Promill.

Z' Allschwil usse lyyte si und frooge denne
ob me die Schnapslyych do däti kenne?
Sie luegt, leggt s'Gsicht in Falte:
"Danggscheen, s'isch mi Alte".

Dodermit wär glar beleggt
was in somne CHIP inn steggt.
e Hail fir d'Menschhait kennt das wärde
und e Quantesprung uff dr Ärde.

D Ladäärne Uusstellig uff em Minschterblatz und d Waage-
und Reggwisyte Uusstellig bi dr Kasäärne sin vom Määntig
zoobe bis am Mittwoch demoorge (14. bis 16 Hornig). Deert
ka men au alli Zeedel und Schnitzelbängg, d Blaggedde und
dr Rädäbäng kauffe.

www.fasnacht.ch/mutze-bebbi